

NO. SOALAN : 40

**PEMBERITAHUAN PERTANYAAN BAGI JAWAB LISAN DEWAN
RAKYAT**

PERTANYAAN : LISAN

**DARIPADA : DATO' DR. NIK MAZIAN BIN NIK
MOHAMAD [PASIR PUTIH]**

TARIKH : 6 APRIL 2017

RUJUKAN : 9713

SOALAN:

**Dato' Dr. Nik Mazian Bin Nik Mohamad (Pasir Putih) minta MENTERI
DALAM NEGERI menyatakan laporan terperinci kejayaan yang telah
dicapai melalui pendekatan pemulihan para penagih dadah semenjak
pusat-pusat pemulihan diwujudkan.**

JAWAPAN:

Tuan Yang di-Pertua,

Agensi Antidadah Kebangsaan (AADK) mempunyai pelbagai pendekatan dalam memberi rawatan dan pemulihan kepada penagih dadah seperti pendekatan psikososial dan psikospiritual. Rawatan dan pemulihan ini penting bagi mengelakkan penagih dadah kembali menagih selepas keluar dari pusat pemulihan. Bagi tahun 2016, seramai 5,793 orang klien telah berjaya menamatkan program pemulihan dalam institusi di *Cure & Care Rehabilitation Centre (CCRC)* dan bagi program pemulihan secara sukarela yang ditawarkan di Klinik *Cure & Care 1Malaysia*, seramai 1,359 orang klien telah berjaya menamatkan program.

Klien-klien ini juga menjalani program kemahiran vokasional yang menerapkan elemen pengetahuan (*knowledge*), kemahiran (*skills*) dan sikap (*attitude*). Ini merupakan sebahagian elemen penting dalam pemulihan secara berterusan kepada klien-klien AADK di institusi pemulihan. AADK juga menubuhkan *Cure & Care Vocational Center (CCVC)* di Sepang yang menawarkan kursus-kursus kemahiran jangka panjang selama 6 bulan di bawah persijilan Sijil Kemahiran Malaysia (SKM) bagi membantu klien-klien menceburi bidang pekerjaan berkemahiran dan mengekalkan kepulihan. Pada tahun 2016, CCVC Sepang telah berjaya melatih seramai 252 orang klien dalam 7 bidang kursus iaitu Elektrik, Jahitan, Kimpalan, Landskap, Pastri, Binaan dan Automotif.

Pencapaian kepulihan di kalangan klien juga diukur dengan mengambil kira status pekerjaan klien selepas keluar dari pusat pemulihan. Statistik pada tahun 2016 menunjukkan bahawa secara puratanya, 88% daripada penagih dadah yang perlu melaporkan diri pada setiap bulan kepada AADK mempunyai pekerjaan.

SOALAN NO:41

**PEMBERITAHUAN PERTANYAAN DEWAN RAKYAT
JAWAPAN OLEH YB DATUK SERI DR. S. SUBRAMANIAM
MENTERI KESIHATAN MALAYSIA**

PERTANYAAN : LISAN
DARIPADA : YB TAN SRI WILLIAM MAWAN IKOM
[SARATOK]
TARIKH : 06 APRIL 2017
SOALAN :

YB Tan Sri William Mawan Ikom [Saratok] minta **MENTERI KESIHATAN** menyatakan rasional kenaikan caj rawatan pergigian dan perubatan di hospital dan Klinik bagi kelas 3.

Tuan Yang Di Pertua,

Seperti yang sedia maklum, kos sebenar rawatan pergigian yang merangkumi kos bahan, kos peralatan, kos perkhidmatan sokongan serta emolumen telah semakin meningkat. Banyak prosedur pergigian biasa di klinik primer dan prosedur baharu serta kompleks di bawah bidang kepakaran yang tidak disenaraikan sebelum ini telah dibekalkan secara percuma di mana kos sebenarnya menelan belanja yang tinggi kerana kebanyakannya memerlukan peralatan atau bahan pergigian yang canggih dan diimport.

Justeru, pengemaskinian prosedur dan caj rawatan pergigian merupakan salah satu daripada beberapa bahagian dalam Perintah Fi (Perubatan) 1982 yang telah dikaji semula. Ia telah dibentangkan dan dipersetujui oleh Mesyuarat Jemaah Menteri pada 21 September 2016.

Caj bagi rawatan pergigian (Jadual F) dalam Perintah Fi (Perubatan) (Pindaan) 2017 adalah menunjukkan kos rawatan asas semasa (bersubsidi) bagi rawatan pergigian di fasiliti kesihatan Kementerian Kesihatan Malaysia (KKM). Semakan caj pergigian ini adalah hanya melibatkan pengurangan subsidi bagi pesakit **Kelas 1 dan Kelas 2** manakala caj rawatan pergigian sedia ada bagi pesakit **kelas 3** (pesakit dalam) adalah **dikekalkan**.

Walaupun sememangnya terdapat keperluan kenaikan caj bagi prosedur rawatan sedia ada, Kerajaan terus komited memberikan subsidi yang tinggi bagi rakyat termasuk rawatan pesakit luar. Justeru caj rawatan pergigian sedia ada bagi **pesakit luar adalah kekal** misalnya pesakit luar hanya perlu membayar sekadar RM2 untuk penskaleran dan penggilapan gigi (scaling/cuci gigi), RM2 untuk tampalan gigi dan RM1 untuk cabutan gigi.

Pengecualian bayaran bagi golongan tertentu termasuk **mereka yang kurang berkemampuan** juga adalah dikekalkan seperti sedia ada mengikut tatacara yang telah digariskan. Ini menunjukkan Kerajaan sememangnya terus komited untuk memberikan perkhidmatan dan rawatan kesihatan berkualiti tinggi pada kadar yang berpatutan kepada semua Rakyat Malaysia.